

DOMINGU XXII TEMPU KOMÚN – TINAN C

Tema

Liturjia domingu ne'e nian propoin mai ita reflesaun ida kona-ba valór ruma ne'ebé akompaña dezafiu “Reinu” nian: haraik-an, gratuidade, domin laho interese.

Evanjellu koloka ita iha ambiente han hamutuk iha farizeu ida nia uma, kontestu atu ko'alia kona-ba “han-hemu hamutuk iha Reinu”. Ba ema hotu ne'ebé hakarak partisipa iha “festa han-hemu” ida-ne'e, Jezús rekomenda haraik-an; tempu hanesan, Nia ko'alia sai kona-ba sira ne'ebé iha atitude hodi moris lójika ambisaun nian, luta ba podér no rekoñesimentu, superioridade iha relasaun ho ema seluk... Jezús sujere mós, katak ema hotu simu konvite ba “han-hemu Reinu nian”; no katak gratuidade no domin laho interese tenke karakteriza relasaun entre partisipante sira “festa han-hemu” nian.

Iha *leitura dahuluk*, matenek-na'in ida inísiu sekulu II mK fó konsellu kona-ba haraik-an nu'udar dalan atu haksolok Maromak no ema sira, atu iha ézitu no hetan ksolok. Ne'e mak repetisaun fundamentál ne'ebé Maromak nia Liafuan ohin apresenta mai ita.

Leitura daruak konvida fiar-na'in sira ne'ebé hakdasak iha fiar kómodu no laho eziyénsia boot, atu deskobre fali novidade no eziyénsia kristianizmu nian; nia insiste katak enkontru ho Maromak mak esperiénsia ida komuñau, prosimidade, domin, intimidade nian, ne'ebé fó sentidu ba ema sarani ninia dalan. Ita bele liga ida-ne'e ho tema sentrál liturjia ohin nian – haraik-an, gratuidade, domin laho interese – liuhusi tema eziyénsia nian: moris sarani nian – moris ne'ebé suli husi enkontru ho Maromak nia domin – mak moris ida ne'ebé eziye husi ita valór no atitude determinadu, entre sira-ne'e mak haraik-an, simplisidade, domin ne'ebé saran nu'udar don.

LEITURA I – Sir 3,19-21.30-31

Ita iha inísiu sékulu II mK. Eelenizmu hahú ninia servisu atu halo aat kultura no valór tradisionál Israel nian. Ema judeu barak – inklui membru sira família husi orijen amlulik sira-nian – halai tuir kultura ne'ebé elenizmu lori, hodi husik valór rain rasik nian no adere ba valór kultura ne'ebé invade...

Jezús Ben Sira, livru ne'e nia autór, mak judeu tradisionál ida, foti sae fiar no valór sira Israel nian. Tanba nia konxiente katak elenizmu ameasa Povu nia abut sira, nia hakerek atu defende patrimóniu relijiozu no kulturál judaízmu nian. Nia buka konvense ninia kompatriota sira katak Israel soi, iha ninia “Torah” ne'ebé Maromak rasik revela, “sabadouria” loos – “sabadouria” ida aas liu “sabadouria” grega. Ba israelita sira ne'ebé monu tuir kultura grega, Jezús Ben Sira fó hanoin kona-ba limanrohan komún, hodi subliña valór judaika nia superioridade no hatudu katak kultura judaika la lakon ho kultura grega.

Testu ne'ebé ohin propoin mai ita pertense ba parte dahuluk livru nian (kf. Ben Sira 1,1-23,38), ne'ebé ko'alia katak Maromak mak hakiak “sabadouria” no ofere se ba ema hotu. Iha ne'e iha “dadolin” no “provérbiu” barak ne'ebé hanorin arte moris di'ak nian no sai haksolok.

MENSAJEN

Testu apresenta an nu'udar “instrusaun” ne'ebé aman ida fó ba nia oan. Tema fundamentál “instrusaun” ne'e nian mak hariak-an.

Ba Jezús Ben Sira, haraik-an mak kualidade fundamentál ida ema tenke haburas. Nia mak garante ba ema “Maromak nia grasa”. Haraik-an la’ós forma ida moris nian ba ema kiak sira ne’ebé la iha preparasaun; nia mak buat ruma ema hotu tenke haburas, hahú husi sira ne’ebé konsidera an eh ema konsidera importante liu. Autór afirma de’it importánsia haraik-an nian hodi la esplika tan ho modu detalladu. Ba nia haraik-an mak segredu ba “sabedouria”, ba susesu, ba ksolok.

LEITURA II – Heb 12,18-19.22-24a

Ita iha parte dalimak Surat ba Ebreu sira (kf. 12,14-13,19). Depoizde husu perseveransa no konstánsia iha prova sira (kf. Heb 12,1-13), autór husu konduta ne’ebé la’o ho fiar sarani: mantein no haburas relasaun iha armonia, adekuada, justa, hasoru ema no Maromak.

Iha testu ne’e, autór konvida destinatáriu sira surat nian ba fidelidade ba vokasaun sarani. Ba ne’e, nia halo paralelu entre relijiaun tuan no proposta foun salvasaun nian ne’ebé Kristu mai apresenta. Fiar-na’in sira simu konvite atu deskobre fila fali novidade kristianizmu nian ne’ebé uluk dada sira no halo sira hakohak ho entuziazmu... Atu ita komprende, hakerek ne’e dirije ba comunidade ida ne’ebé sai baruk, ne’ebé prezisa deskobre fundamentu réal nia fiar nian no ninia kompromisu, atu enfrenta – ho korajen no ézitu – tempu difisil sira persegisaun no martíriu nian ne’ebé besik daudaun.

MENSAJEN

Autór estabelese kontraste kle’an entre esperiénsia komuñau ho Maromak ne’ebé Israel halo iha Sinai no esperiénsia kristán.

Esperiénsia Sinai nian mak esperiénsia ida ne’ebé hamosu ta’uk, opresaun, maibé la’ós relasaun pesoál iha intimidade, konfiansa ho Maromak, ho membru seluk comunidade Maromak nia Povu nian. Kuadru revelasaun Sinai nian mak kuadru hamta’uk nian ida, ne’ebé la halo buat barak atu hakbesik ema ba Maromak, iha enkontru loos ida bazeia ba domin no konfiansa.

Iha experiénsia kristán, la iha buat ne’ebé hamta’uk, halo nakdedar, opresaun nian. Liuhusi Batizmu, sarani sira hakbesik Maromak rasik; iha esperiénsia ida prosimidade nian, komuñau nian, intimidade nian, domin loos nian... Esperiénsia kristán mak, loos duni, espresaun festiva ida, ksolok loos nian. Hodi esperiénsia ne’e, sarani sira hola parte ba Maromak santu, juiz universu nian, maibé mós Maromak laran-di’ak no domin nian; sira sai ida ho Kristu, mediador aliansa foun nian, sai Ninia maun-alin sira, sai erdeiru moris rohan-laek nian; sira hola parte ba anju sira nia moris, iha ezisténsia ida festa nian, hahí nian, agradesimentu nian, adorasau nian, kontemplasaun nian; sira hola parte ba ema justu seluk ne’ebé hetan ona moris rohan laek, iha komuñau fraterna moris no domin nian.

EVANJELLU – Lc 14,1.7-14

Iha etapa “dalan Jerusalém nian” Jezús tuur iha meza, iha loraon sábadu ida, iha farizeu xefe ida nia uma. Karik ne’e mak refeisaun solene sábadu nian, ne’ebé halo iha meiudia, filafali husi orasaun iha sinagoga. Baibain konvida mak bainaka sira ba han-hemu ida-ne’e; durante refeisaun, kontinua diskusaun kona-ba leitura sira rona iha ofisiu sinagoga nian.

Lucas mak evanjelista ida mesak ne’ebé hatudu farizeu sira besik ba Jezús to’o konvida ba uma no tur iha meza ho Nia (kf. Lc 7,36; 11,37).

Farizeu sira forma grupu relijiozu-polítiku pinsipál iha sosiedade palestina tempu ne'ebá nian. Sira mak domina orasaun sira iha sinagoga no nafatin prezente iha ain-hakat relijiozu hotu israelita sira-nian. Preokupasaun fundamentál mak tranzmite ba ema hotu domin ba Torah, ida hakerek nian no mós ida orál. Sira grupu sériu ida, haka'as an tebes atu Maromak nia Povu moris santu; maibé, hodi absolutiza Lei, sira haluha ema no hanehan domin no laran-sadia. Hodi konsidera sira nia an nu'udar “moos/puru” (tanba moris tuir Lei), sira despreza povu husi foho, ne'ebé tanba ignoránsia no moris susar, la bele kumpre didi'ak ukun-fuan sira Lei nian. Konxiente kona-ba sira-nia kapasidade, integridade, superioridade, sira la'ós modelu haraik-an nian. Tanba ne'e mak Evanjellu ko'alia kona-ba hadau malu fatin aas ka fatin uluk.

Ita iha mós kontestu “han-hemu” nian. Iha mundu semita “refeisaun” mak espasu enkontru fraternu nian, iha ne'ebé konviva sira partisipa iha ai-han hanesan no estabelese tali komuñau nian, proximidade nian, familiaridade nian, maun-alin/irmandade nian. Jezús dala barak envolve an iha “festa han-hemu”, la'ós tanba Nia “kaan-teen no hemudór” (kf. Mt 11,19), maibé tanba, nu'udar sinál komuñau nian, enkontru nian, familiaridade nian, refeisaun/han-hemu haklaken realidade “Reinu” nian.

MENSAJEN

Testu apresenta parte rua. Parte dahuluk (vers. 7-11) aborda kestaun haraik-an nian; parte daruak (vers 12-14) trata kona-ba gratuidade no domin laho' interesse. Parte rua iha ligasaun ba malu liuhusi tema “Reinu” nian: ne'e hotu mak atitute fundamentál ba sira e'ebé hakarak partisipa iha festa “Reinu” nian.

Jezús nia liafuan ba konvidadu sira ne'ebé hadau malu fatin onra nian la'ós nvidade ida, basá Testamentu Tuan mós fó konsellu atu keta okupa fatin dahuluk sira (kf. Prov 25,6-7); maibé buat ne'ebé iha Testamentu Tuan mak ezortasaun morál ida, iha Jezús nia liafuan sai apresentasaun “Reinu” nian no lójika “Reinu” nian: “Reinu” mak espasu ida irmandade nian, fraternidade nian, komuñau nian, partilla nian no servisu nian, ne'ebe esklui atitute superioridade naran de'it, foti-an nian, ambisaun nian, domíniu ema seluk nian; sé mak hakarak tama iha nia, tenke halo an ki'ik-oan, simples, haraik an no la iha pretensaun atu sai di'ak liu, justu liu, eh importante liu ema seluk. Ne'e mak lójika ne'ebé Jezús propoin nafatin ba ninia eskolante sira: Nia rasik, iha “han-kalan despedida nian”, hamutuk ho eskolante sira molok mate, fase eskolante sira nia ain no harii sira nu'udar komunidadade domin no servisu nian – hodi fó hanoin katak, iha komunidadade “Reinu” nian, sira ne'ebé uluk sai ema hotu nia atan (kf. Jo 13,1-17).

Iha segunda parte, Jezús kestiona práika atu konvida ba festa belun sira de'it, maluk sira de'it, maun-alin sira familia nian, ema viziñu riku sira. Farizeu sira hili didi'ak konvidadu sira ba meza. Sira la konvida ema nivel kraik nian, ema maksalak, povu foho nian tanba lakohi iha partilla, irmandade ho sira. Maibé sira iha tendénsia atu konvida ema hotu ne'ebé bele selu fali sira nia konvite no sai interkámbiu favór nian no la'ós ona gratuidade no domin laho' interesse.

Tuir Jezús – hanesan lójika Reinu nian husu – presiza konvida mak ema kiak sira, ain-kude'ik sira, ema aleijadu sira, ema matan-delek sira. Ema matan-delek, ain-kude'ik no aleijadu mak tuir sira-nia hanoin ema maksalak no hetan Maromak nia malisan nune'e la bele tama iha Templu (kf. 2 Sm 5,8) atu keta hafoer fatin sagrau ne'e (kf. Lv 21,18-23). Sira ne'e mak, tuir Jezús tenke konvida ba “festa han-hemu” nian. Jezús haklaken iha kontestu ne'e “festa han-hemu Reinu nian”.

Jezús fó sai karakterístika sira “Reinu” nian hanesan “festa han-hemu” nian, iha ne'ebé konvidadu sira sai ida de'it iha tali familiaridade nian, irmandade nian, komuñau nian. Ba “festa han-hemu” ida-ne'e hotu-hotu simu konvite, laho' esesaun, sira ne'ebé kultura sosiál

tau iha ninin no esklui mós. Relasaun entre sira ne'ebé adere ba festa “reinu” nian la marka ho interese, maibé ho gratuidade no domin laho interese; no partisipante sira festa ne'e nian tenke hasai husi sira atitude superioridade nian, foti-an nian, ambisaun nian, atu soi atitude haraik-an nian, simplisidade, servisu nian.